

# INUIT ATAQATIGIIT INATSIARTUNI



UKA2023/Imm. 118

## **Uunga siunnersuut:**

Arpattarfiit aammalu atletik atorlugu sungiusartarfiit allat nuna tamakkerlugu sananeqarsinnaaneriniq periarfissanik misissuinissamik Naalakkersuisut peqquneqarnissaat pillugu Inatsisartunut aalajangiiffigisassatut siunnersuut. (Inatsisartunut Ilaasortaq Nivi Olsen, Demokraatit)

## **Oqaaseqaat:**

Demokraatit sinnerlugit aalajangiiffigisassatut siunnersuuteqartoq, Nivi Olsen, Inuit Ataqtigiiit sinnerlugit siunnersuutinnut siullermik qutsavigerusuppakkit.

“Nunarsuarmi timimik aalatitsinerpaaq” – tassa nunarput 2030-mi.

Kalaallit Nunaanni timersoqtigiiit kattuffiata taama anguniagaqarluni ukioq manna saqqummersumi periusissialiorsimavoq.

Periusissiaq qulequtaraa – “Nuna ataatsimoorussamik anguniagalik” – pingaarutilerujussuarnillu suliniutinik siunniussaqaarluni.

Periusissiap nunatsinni timersornermut politikkeqarnissarput aqqutissiuutissavaa - kajumissutsimik suliaqartartut, peqatigiiffilerisut, kattuffiit, suliffeqarfiit, kommuneqarfiit oqartussaqaarfiillu peqatigalugit.

Ilumoorpormi – inuiattut aalanerusariaqarpugut – tamannalu aqqutissiuutissagutsigu – soorunami tamatta taassumunnga taava peqataasariaqarpugut.

# INUIT ATAQATIGIIT INATSISARTUNI



Kisitsisimmi qiviarutsigit – inuiaqatigiittut ineriartorsimanitta ilutigisaanik – nunarsuatsinni pissutsit assigalugit – inooriaatsimik pissuteqartumik nappaateqartut amerleriapiloorsimapput.

Tamannalu minnerunngitsumik peqqinnissaqarfimmut annertuumik – annertusigaluttuinnartumillu – tatisivoq. Assersuutigalugumi naatsorsuutigineqarpoq nunatsinni sukkortut amerlassusaat ukiumut 100-t missaanik amerleriarfiusassasut.

Taamaattumik inuiaqatigiittut – aamma timikkut tarnikkullu peqqissutsip tungaasigut – annertuumik unammilligassaqpugut.

Inuit Ataqatigiit peqqissuseq paasisarpaat “timikkut, tarnikkut inooqatigiinnikkullu inuummarissuseqarnertut”.

Peqqissuserlu tassaavoq inuttut ataasiakkaatut anguniagaqarsinnaanitsinnut, inuiaqatigiinnullu pitsaasumik sunniuteqartumik tunniussaqaarsinnaanitsinnut minnerunngitsumillu inuttut kiffaangissuseqarnissatsinnut tunngaviulluinnartoq.

Timittalu aamma atornerisigut – timersornikkut aalanikkullu – inuttut peqqinnerulersarpugut. Imminut tatiginerulersarpugut, inoqatititsinnik attaveqarnerput pitsaanerulersarpoq – tassuunakkullu eqqarsartaatsikkut ilikkakkatigullu inuunitsinni unammilligassagut – takkukkumaartussallu suugaluarnersut – unammillerluarnerulersinnaalertarlutigit.

Taamaamat aalaneq timersornerlu atorlugit nunatsinni allannguilluarnissatsinnut angusassanik toraagaqarluta tamatta

# INUIT ATAQATIGIIT INATSISARTUNI



suleqataasariaqarpugut.

Taamaattumik timersoriaatsinik allanik siunnersuuteqartup ujartuilluni – soorlu atletik atorlugu timersuutini sanaartornissat sanaartornissamullu periarfissat misissortikkumallugit siunnersuuteqarnera tunngaviusumik Inuit Ataqatigiinniit tapersorsorparput.

Nalunngilarpummi timersortarfiit arlallit nutaanngilillutillu piffissamut naleqqukkunnaarnikuusut. Taamalu killiffeqarnerput aamma GIF-p periusissiaani iliuuseqarfigineqartariaqartoq oqariartuutigaat.

‘Timersortarfiit timersoriaatsinut ataasiakkaanut ikitsunnguanulluunniit suliarineqarnissaat akisoorujussuupput piffissamilu sivisuumik atorneqarsinnaaneq ajorlutik. Taamaattumik timersortarfiit timersoriaatsinut arlalinnut assersuutigalugulu kulturikkut ataatsimoorfiusinnaasut sanaartortinneqarnissaat ukkatarineqartariaqarpoq. Haalit allallu sanaartukkat meeqqat, inuusuttut inersimasullu naapeqatigiiffigisinnaasarivaat taakkualu illoqarfinni pisartunut eqqarsaatigineqarnerusinnaapput ataatsimoorfigineqarnerusinnaallutillu.’

Inuit Ataqatigiinniit isumaqarpugut misissuisoqarnissaa pillugu aalajangertigata Kalaallit Nunaanni timersoqatigiit kattuffiat siullermik qanimut ataatsimiitsitaliami susassaqartumi oqaloqatigineqaaqqaartariaqartoq – taakku isaannit nunatsinni timersornerup siuarsarnissaanut timersortarfiit timersoriaatsinut arlalinnut tulluurtunngorlugit sanaartortinneqarnissaat eqqarsaatigalugu kattuffittut takorluugaat tusarusukkatsigu.

Taama oqaaseqarluta siunnersuut ataatsimiitsitaliamut susassaqartumut suliassanngorteqqinneqarnissaa inassutigaarput.